



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : Tir Yimiyim tir\_yimiyim

tir yimiyim TAPAK 7

Bihar CM Nitish Kumar-i April 10 nü  
MP tenangzükba agitsü

Iran army tekolakbai  
tanishirtem dang renemtsü tuyur



VOL. XXIII ISSUE NO. 170 (ADOK 170) DIMAPUR ROGONÜ (FRIDAY) RONGCHII (APRIL) 03, 2026 ₹ 5.00

## GOOD FRIDAY SODI

Alima meimchirtem temenen nungi kümzüksü asoshi Yisu Khrista asüba anogo bilemteta amongba 'Good Friday' anogo nung sarasadema amongtsü asoshi Tir Yimiyim office tanü April 03, 2026 nü shibanger, anungji April 04, 2026 Tir Yimiyim adok malitsü.

- Ketdangsür, Tir Yimiyim.

## Dimapur ajanga VVIP senzütsü aliba mechi security akangshir

**Dimapur, Rongchii/April 02 (TYO):** Tongtipang nisung (VVIP) ka April 6 nü Dimapur Airport ajanga Assam-i aotsü ama aliba mechi Dimapur aser Chümoukedima districts nung khen atema security mera balala agir ta Commissioner of Police, Dimapur, Aotula T. Imchen, IPS ajanga sangdong ka nung metetdaksü.

Chümoukedima district ajunga April 6, 2026 anepdang 6:00 ako nungi nikongdang 6:00 ako tashi "Red Zone" (No Fly Zone) asütsü sangdonger. Iba mapang Remotely Piloted

Aircraft (RPA) mesüra drones amala amshiba ajunga nokdangtsü, ta ashi.

Kasa mapang security forces, civil police central forces, private firing ranges nung firing practice kecha malitsü aser civilian temi licensed firearms amshitsü memelar.

Iba anogo anepdang 6:00 ako nungi nikongdang 6:00 ako tashi firecrackers apoktsü memelar. Nüburtemi timtem majurutsü aser VVIP senzüba mapang security akangshitsü mechi iba totuyuba ya agütsür, ta sangdong ajangasa ashi.

## Daochier-i vote aika agi akoktsü: Temjen Imna Along



**Mokokchung, April 02, 2026 (TYO):** Tang aruya aliba 28-Koridang Assembly Constituency by-election nung ya Daochier I. Imchen, shiba PDA consensus candidate ka lir aser BJP ticket amer air, pai ayongayonga vote aikadi akoktsü, ta Nagaland Tourism and Higher Education Minister, Temjen Imna Along-i 2nd April, 2026 nü osangbener senden ka Hotel Whispering Winds, Mokokchung nung akadang sangoktsü.

Asür Imkong L Imchen'er jabaso Daochier I. Imchen atema Koridang constituency kübok yimtsüng balala sema nübu yima jajadang, yim ajaki pelaba shishia agizükba den telangzüba tajung nguogo, anungji, ajak dang pelaba den iba campaign kanga dang takok nua kaogo, ta pai metetdaksü.

Koridang by-election nung tokteperitem candidate par 6 rongnung karbo metoktepi akümtsü ana nung lir, parnoki PDA consensus candidate nungittsü asoshi tang telung nung jembishinüba mapang ka

lir, anungji, polling anogo tajung dang ataloktsü imlar, ta pai ashi.

Election ya democracy yimsü benschirtem asoshi benjong tulu ka lir, anungji, nüburtemi pei senti vote satemsatema agütsütetsüsa alima tensa tia tajungtiba nung azüoka agitettsü asoshi Mokokchung DC aser SP ajurutepa iba dak sentakba nung jembishinütsü lir, aser nüburtemia petsaperong kecha madoki election tesünep aser yimjung nung agitsü ayongzüker, ta paisa mepishia metetdaksü.

Daochier Imchen ya lanur ka dang lir, aser tazünga tulu aliba nübu ka aser Koridang sangeri pai mapa tajung inyaksü ta tamang akaba asoshia pelar, ta paisa shisem. Campaign mapang yimtsüng balalai amalitepba den Star Campaigner - Nagaland Dy. CM Y. Patton aser BJP State President Benjamin Yepthomi nadi anir Minister, MLA & Advisors aser party telen balala nung lenirtem shirnokisa yaritepogo parnok ajak dang paisa pelaba lemsatep.

## NPP tokolakba Conrad K. Sangma-i par party candidate I. Abenjang asoshi nübu yimtsü



Meghalaya Chief minister Wb. Conrad Sangma Longkhum yimti nung par NPP telok nüboyimba sentong nung agiba noksa ka yangi angur. (Longkhum, April 02, 2026)

**Longkhum, April 02, 2026 (TYO):** National People's Party (NPP) Tir aser Meghalaya Chief Minister, Conrad K. Sangma-i April 9, 2026 nü 28-Koridang Assembly Constituency by-election nung par party candidate I. Abenjang atema nübu yimtsü

Longkhum yimdaki arua community hall nung lokti senden ka nung shilem agia jembi.

Senden nung jembidang Sangma-i NPP nükjidongji northeast nüburtem wazüka, kümzüka aser lungjemdaksütsü

asoshi tenzükba lir, ta metetdaksü.

Party candidate dak tamang katetba olen ka jembidang Sangma-i, I. Abenjang nem maongka agütsüra constituency nung alirtem bendanga agüja tenzüksü renema lir, ta ashi. Paisa, election nung par party-i takok tajung angutsü sarasademtsür, ta ashi.

Paisa par candidate adokra tang Longkhum nung Cherry Blossom benjong amungba ya jengang tajungba aser tuluba nung amungtsü asoshi akokba lenmangtem bushitepa inyaksü, ta metetdaksü.

Iba den iba party yagi lanurtem nem temulung kanga agütsür. Northeast nung sempet aketer lanur jenti lir, parnokji anitena parnok nem maongka lapoktsütsü mapatong balala inyaksü, kechiyong lanurtemji asenok asoshi tashi aser tebilemstü lir, asenoki parnokji züzüa toktsüra parnok mashileni aotsü ana nung lir, ta ashi.

(Maneni tapak 8 nung...)

## Dimapur nung DC Office tasenba atema nüngshilong azüngogo

**Dimapur, Rongchii/April 02 (TYO):** Dimapur nung Deputy Commissioner indang Office Complex tasenba atema nüngshilong azüngba sentong ka April 2, 2026 nü DC Office Complex, Dimapur nung agiogo, kong sorkar ketdangsür, advisors, lokti tentet balala nungi lenirtem aser nüburtem dena liasü.

Iba sentong ya district administration ki o jen yangluba nung tongtipang alizüng ka alitsü aser Dimapur nung nübur nem service agütsüba kanga agi tajungba akumtsü imlar.

Sentong akhumdong Advisor, CAWD & Taxes, Kudecho Khamo-i jembidang Chief Minister aser jelia sentong yanglua aliba mechi medentetba tongtipang nisungtem tenüng nung salem lemsatepa liasü.

Chief Minister Dr. Neiphu Rio lenisüba kübok state sorkar dang pelaba lemsatep aser mapang talangka nungi modern DC complex yanglutsü mangdang aliba tanü asangsang kumogo, ta pai ashi.

Sorkari yimsüsüba yimya aser nübur tenzükba tashi itshitsü atema sorkari inyakba indang lemsatepdang, deputy commissioner complexes, additional deputy commissioner offices aser staff quarters densema administrative buildings aika state tesem balala nung yangluogo, ta pai ashi.

Sorkari ki o jen yangludang, itemji wazüka ayutsü aser anepalutsü nüburtem mapa lir, anungji civil society organizations aser nüburtemi terenlok mapa

nung shilem agia state ajungtsü mechi külemi inyaksüla, ta Khamo-i ayongzüker.

Dimapur ya 'commercial hub' aser 'mini-India' ama lir, kong kin balala nungi nüburtem külemi andenshia alir, ta ashi. State atema Dimapur ya tongtipang lir, anungji telungjem, kati ka akumtsüboba aser yimjung nung alitsü nüngdaker, ta ashi.

Pai nüburtem dang ochishia alitsü, dangar anepalua amshitsü aser tongmelang takum alitsü aser kasa mapang pei maitsü, sobaliba aser tamangba yimsü wazüka ayutsü ayongzüka liasü.

Advisor, Industries & Commerce, Hekani Jakhalu-i jembidang nisung ajaki khuret angateta abentsü, telungjem nung alitsü aser nüburtemi yariteptsü ayongzüka liasü.

Iba project ya Chief Minister asoshi tongtipang lir, kechiaser ibai Nagaland tesem ajunga nung district administration tashi itshitsü pa indang mangdang aliba den lirumedemer, ta lai ashi.

Tanü iba nüngshilong azüngba anogo ya tongtipang lir, kechiaser 1976 küm ADC headquarters upgrade sür tanü küm 50 ajunger, ta ashi.

District administration teinyaksü nung rangloker jembidang, Dimapur ya Nagaland indang "heartbeat" aser rongsenketzüng aser shishilempaba maparen asoshi tesepe tuluka lir, ta Advisor Jakhalu-i ashi.

Ki tasenba ya nüburtem meyong lir, anungji iba ki mapang shidak nung renemtsü asoshi

arok teinyaksü lir, ta lai ashi.

Lai departments, contractors aser nüburtem dang külemi inyaka iba project ya state nung danga district tem asoshi model ka kumdaksütsü ajungshia liasü.

Sentong nung Advisor, Labour & Employment, Skill Development & Entrepreneurship and Excise, Moatoshi Longkumer-i jembidang, küm 52 sülen iba maongka anguba atema Dimapur nung aliba nüburtem kanga pelateper aser iba project sanction asüba atema state sorkar dang pelar, ta ashi.

Iba project agütsüba atema pai Dimapur nung aliba nüburtem tenüng nung CM Rio dang pelaba lemsatep aser Department of CAWD den Advisor, Commissioner aser Additional Chief Engineer temi meranga inyakba asoshia tenüngsang agüja liasü.

Iba project ya ki tasen ka dang masü saka iba complex yagi nübur tenzükba nung ochishiba aser temeim aliba sayutsü aser ki o jen, technology aser accessibility tajungba amshia yimsüsüba tajungba akumtsü imlar, ta pai ashi.

Pai contractors aser engineers tem dang iba project ya mapang shidak nung renemtsü aser kasa mapang kisü-jensüba yimya shidak amshitsü ayongzüker aser mapang menudaksüba aser sen timba akumba ajanga nüburtem tali tim atemtsü, kechiaser office ka khen atema Purana Bazar-i belena alitsü tebilemba lir, ta ashi.

(Maneni tapak 8 nung...)

## IND candidate Imchatoba-i Mangmetong yimdak declaration agütsü GST dak sendakba nung orientation sentong agi



Mangmetong yimdak Independent candidate Imchatoba Imchen indang declaration sentong agir külen, putu yimsüsürtem den külemi tangokba noksa nung angur. Mangmetong, 2nd April, 2026 (Photo credit: www.nokinketer.in)

**Mangmetong, April 02, 2026 (TYO):** Independent candidate Imchatoba Imchen shiba tang aruya aliba 28-Koridang Assembly Constituency by-election nung tokteper, pai 2nd April, 2026 nü par yim Mangmetong nung pa election-i aiba osang sangokja yim community hall nung sentong ka agia liasü.

Pai iba sentong nung mapang tatsüka agidang, Koridang ya regional akangkanga ametba mungjen ka lir aser yangi nungi tangari metetba linük tenzüker jenti adokogo. Anungji, par tsüngsü mamatoki Naga yimden

tebilemsü keno atema maneni wazüka ayutsü asoshi inyaksü tejangraba tulu lir, ta metetdaksü. Tangar den liru medema Koridang constituency ya-a tejakleni anitsü mangdang tulu lir, ta paisa metetdaksü.

Koridang ya Aor aser Naga nunger temangi ranglokba assembly constituency ka lir, iba ama tensa ka nung nüburtemi shiba shimer yoker ta asübaaji kanga tongtibang aser iba jagi osang tulu ka alima nem sangoktsütsü, ta pai ashi.

Pungmang jenti den tangatetba tajung bener Koridang sanger asoshi taküm bendanga tenzüksü election

nung noktaker, iba den election timi tesünep aser yimjung nung tembangtsü tangatetba lir, anungji, senso nübur ajaki pei temeten vote pei-i mulungba lenir nem ajentsütsü asoshi kishi satema lapoktsütsüla, ta paisa mepishia metetdaksü.

Tang aruya aliba Koridang by-election nung ya Mangmetong yim nungi candidate ana lir. Imchatoba Imchen den ano taoba MLA & Advisor asür Imkong L. Imchen'er jabaso Daochier I. Imchen shiba PDA consensus candidate lir, pa BJP ticket nungi air. Koridang by-election polling ji 9th April, 2026 nü agitsü.

## Mon nung Konyak nungertem Aoleang Monyu benjung amung



**Dimapur, Rongchii/April 2 (TYO):** April 2 nü Heritage Complex, Mon nung Konyak Aoleang Monyu den repsema Mini Hornbill Festival 2026 amguba mapang Arunachal Pradesh nungi MLA Thangwang Wangham alakteta jaoker liasü.

Sentong nungsa Eastern Sumi Hoho tir K. Tokishe Sema tetushi tejaoker aser MLA, Y. Mankhao Konyak Chief Host liasü.

Alakteta jaoker ama benjung salem lemsatepba mapang Wangham-i, iba benjung nung densemba atema kanga pelaba aser pa ya alakteta jaoker ka ama masü saka adianu ka ama arur ta ashi. Land of Angh-i iba benjung ayongzüka amunger, kong kidanger state tem aser state kübok tesem balala nungi nüburtem ka ama longjemdaksüogo. Iba amala mapangtem ajanga asenok mepila saka paper nung yimden yimsüsüba tsütsü arrtsü agi lemdangtsüba dang lir ta

angateter, ta Thangwang-i ashi. Paisa, FNTA atema tenangzüktepba yangluba atema ENPO nem tenüngsang agütsüba den nüburtem dang nüburtem terenlok atema meranga inyaksü ajungshi

Sentong nungsa o tatsüka jembiba mapang tetushi tejaoker Tokishe Sema-i, benjung ajanga Konyak nunger takar sobaliba, telongjem, maitsü aser lokti telongjem tashi sayur ta ashi.

Kasa mapang nung Chief Host, MLA, Y Mankhao-i Aoleang Monyu benjung amguba indang tatsü agi lemsatep. Maneni EAC Mon, Shekhozho Vero, NCS-i, Konyak Union-i Konyak nungertem shisatsü tajung agi telongjem aser tashi ita anir arudar ta ashi.

Sentong nung Arunachal nungi Wancho Modern tsüngsang ka saka aser Wayen Union Mon (tebur); Tobu Area Union, Mon (tetsür); Wakching Area Union, Mon (tetsür); Chi Union (tebur); Konyak Gazetted Officer s'

Union aser Tangnyu & Yuching Union (tebur) nungeria sobaliba tsüngsang aser ken balala saya liasü. Sentong nungsa Canticles Band aser Angao Ngunglim nungeri ken aten

Sentong ya Konyak nunger sobaliba taren nung pela agizükba sentong agia tenzüker aser iba sülen Longwa nungi Pongvun wang, Tonyei Phawang-i Konyak Aoleang Monyu lapoktsü aser Mon Union, Mon Town-i süngkong tema liasü.

Benjung sentong ya Manjun & ManyeiKuhmeishu N na lenisüba nung agi aser Rev. L. Metjen, Executive Secretary, KBBB-i Tsüngrem temaotsü meshizüka sarasadem. Sentong nungsa Konyak Union tir K. Yamao Konyak-i lokti pela agizükba ojemi aser Social & Cultural Secretary, KU Wangchung Konyak-i tepela o jembiba liasü. Sentong ya Rev. E. Yeangphong Konyak, Dist. Chaplain, Mon-i sarasadem tembang liasü.

**Dimapur, Rongchii/April 2 (TYO):** Goods and Service Tax dak sendakba nung orientation sentong ka State Taxes Department aser IQAC, DGC na den longjemer Dimapur Govt. College Commerce department-i ayongzüka agiogo. Iba sentong ya Dimapur Govt. College Seminar Hall nung anepdang 9 ako nungi tenzüka agia liasü.

Orientation sentong nung shisalen sayurji Asst. Commissioner of State Taxes, Nagaland, Dimapur Zulutemu liasü, shiba Nagaland dak ajemdaker GST dak sendakba

nung tongtibang onüktem tangazükba agütsü.

Kasa mapang nung sentong lenir Asst. Professor Mezhuhoulie Angami-i iba Orientation ayongzüka agiba nükjidong lemsatep, koba pai ashiba agi, GST indang aziungba B.Com aser B.A. 6th Semester kakethirtem aser B.Com & B.A. 8th Semester kakethirtem atema liasü.

Ajak senteper iba orientation sentong nung kakethir 110-i shilem agi, koba shisalen sayur aser kakethirtem tsüngda sensaksem sentong ka agiba sülen tembang liasü.

## St. Xavier College Jalukie nung 2buba Unscripted sentong agi

**Kohima, Rongchii/April 2 (TYO):** Writers Collective-i ayongzüka 2buba Unscripted sentong March 31 nü St. Xavier College Jalukie nung kanga takok ngua agiogo. Iba sentong nung otsü ashirtem, lokti lenirtem aser Benreu Lui Baudi tir Kevipele Iheilung nungeri shilem agia liasü.

Otsü ashiba sentong nung Kevipele Iheilung, shiba tang Benreu Lui Baudi tir lir, pai 1950s aser 1960s mapang ajangshiba Naga nunger puti otsü lemsatep. Talisa, pai Zeliang nunger puti otsü aser sobaliba indang tangazükba agütsü, kong Zeliang nunger yimtsüngtem kümteta aoba indang densema liasü.

Sentong nungsa Writers Collective General Secretary Dr. Vizovono Elizabeth-i, Unscripted ya Writers Collective indang inyakyim ka lir, koba art balala bendenloka

Naga nunger literature ya ajak atema kümdaksütsü, aser iba den otsü ashiba yimya ya mesamadaksütsü asoshi lir, ta ashi.

Anküp o jembiba mapang Writers Collective tir Vishü Rita Krocha-i, otsü ashiba ajanga otsü tajungba angatetdaksür, ta ashiba den iba sentong ajanga sentepa aliba lokti tangazükba tulu ngua alitsü aser ajungmesor alitsü imlaba lemsatepa liasü.

Otsü ashiba sentong nung St. St. Xavier College Jalukie Principal Dr. Fr. Francis S. Cheerangal-i, lokti pela agizükba o jembiba liasü. College indang English Department nungi Kewiphui, Kewiphui Namdau aser Gaanchuilu nungeri sangro lemsatep. Iba sentong ya St. Xavier College, Jalukie History Department nungi Assistant Professor Namgwangheile lenisüba nung agia liasü.

## Noise pollution özüng ajang ajanga benoktsü

**Dimapur, Metsüremi/March 2 (TYO):** Wokha District Administration-i sangdong ka ajanga, Hon'ble National Green Tribunal (NGT), Central Pollution Control Board (CPCB), aser Nagaland Pollution Control Board (NPCB) nungeri tetuyuba agütsüba dak ajemdaker Noise Pollution (Regulation and Control) Rules, 2000 ajang ajanga benoktsü ta metetdaksüogo.

Tetuyuba koba "Polluter Pays" principle kübok agütsüogo, iba ajanga aibener dang senchi achitsü aliba indang shisema lir aser nüburtem, sentong balala ayongertem aser businesses balala dang iba tetuyuba sülen anidaka public health kümzüka ayutsü aser district yimjung aser tesunep nung toktsütsü ayongzüko.

Tetuyuba nung ashiba agi, loudspeaker aser public address system tem amshitsü atema District Administration nungi tezüluba nung temelaba

meshitsü nungdaker. Item ya aonung (11 PM nungi 6 AM) mesüra silence zone tem nung amshitsü memelar aser aibelenertem dang senchi sen 10,000 achitsü aser parnoki amshiba hadirtem sota ayutsü.

Diesel Generator (DG) set amshirtemia atakzüka aliba noise standard kübok inyaksangshitsüla, ajita mesüra 62.5 KVA atema senchi sen 10,000; 62.5 aser 1000 KVA tsüngda aliba set atema sen 25,000 aser 1000 KVA tema aliba set tem atema sen 1,00,000 senchi achitsü aser iba den hadir mamshidaksütsü asoshi shibangtsütsü.

Ola tulu adokba kisü dang amshiba hadirtem aonung nisung aliba tsemtem aser silence zone tem nung amshitsü memelar aser aibeneletem dang senchi sen 50,000 achitsü aser hadir rakzüka ayutsü. Silence zone tem nung aonung puja bomb apoktsü khenyongi memelatsü.

(Maneni tapak 8 nung...)

### Erode East constituency nung candidate 500 dak temai tokteptsü



April 02, 2026 nü Erode District nung Erode East constituency nungi tokteptsü atema tenü agütsüsü asoshi Mudaliar nunger aika nokdaka aliba noksa nung angur.

**Erode (Tamil Nadu), April 02 (Agencies):** Tamil Nadu nung Senguntha Mudaliar nungertemi, April 23 nü agütsü aliba Tamil Nadu election nung tongti party temi Erode district nung par nisung ka danga candidate meshim, anungji parnok 500 dak temai independent candidates ama tokteptsü telemetba agiogo, ta metetdaksü.

Theninthiya Mahajana Mudaliar Sangam tatong Tir, C Nandhagopal-i, "Iba (Erode) district nung ozü nisung aika lir, talisa Erode East constituency nung ozü nütsüng aika lir. Ozü nütsüngji kibong 80,000 shi asütsü. Erode West nunga ozü nütsüng kibong 50,000 dak tali lir. Iba dak alia Bhavani aser Perundurur nunga ozü nütsüng aika lir," ta metetdaksü.

Südakba industry aser süoshi market dak sendakba nung tebilemsü onük balala benoktsü atema assembly nung ozü kin nungibo züngsem ka danga mali," ta metetdaksü. Tamil Nadu nung Senguntha Mudaliar nütsüng lakh 80 shi lir, ajüsüaka state nung tongti party ana- DMK aser AIADMK-i parnok nem menden anana dang lezmüksü.

Tongtibang party tem ajaki par kin sendoker, anungji parnoki tejashi nung independent candidates ama tokteptsü, ta parnoki metetdaksü.

Nandhagopal-i, "Iba district nung kin sasep nung ozü nütsüng ya tanabuba jenjang nung lir, ajüsüaka tongtibang party temi election nung tokteptsü atema onok nem maongka magütsür.

Tamil Nadu nung Legislative Assembly elections April 23 nü agütsü aser May 4 nü vote zünga election osang sangdongtsü. Iba state nung assembly menden 234 lir.

### Kanga tongtibang Bill ana atema April 16 nü senden ayongzüker

**New Delhi, Rongchii/April 02 (Agencies):** Kanga tongtibang Bill ka benoktsü atema asentenshir April 16 nungi Parliament nung budget senden ayongzüker, ta Brihostibarnü ketdangsertemi metetdaksü.

shiteta yutsütsü. Item bill benoka agizüksü atema Parliament sendenji anogo ananü mesüra asemnü amentsüa akok, ta sorkari metetdaksüogo.

anaji agizüksü atema Lok Sabha aser Rajya Sabha naprongla nung two-thirds majority nüngdaksü, ajüsüaka item bill agizüksüsa NDA teloktep nungi züngsem peria mali, ibayongji sorkari item bill agizüksü atema opposition dang teyari meshir.

Lok Sabha menden tang 543 aliba nungi menden 816 tashi akümtsü atema sorkari bill ka benoktsü aser taruba Lok Sabha election aser assembly elections nung tetsürtem nem menden shilem 33 lezmüksütsü atema bill ka benoktsü.

Brihostibarnü Rajya Sabha senden nung jembidang Parliamentary Affairs Minister, Kiren Rijiju-i, kanga tongtibang bill ka benoktsü atema kobi melii ano senden ayongzüksü, ta metetdakja liasü.

Tanga party tem nem Bill anaji pusemdaksütsü atema Home minister Amit Shah leniba nung inyakdar. Hombarnüa pai senden ana ayongzüka menogo.

Tang state pezü nung assembly election agütsü mapang ana nung lia Ato kilonser Narendra Modi-i tetsürtem nem tashi agütsütsü atema nangzüka aruba ama Women Reservation Act ya ya mapa küma benoktsü atema sorkari inyaker.

Rijiju-i, "Kanga tongtibang bills aser tongtibang onük aika lir. Onoki ibaji opposition den-a lemsatepogo. Taruba hopta ana- asem tsüingda tongtibang bill benoktsü," ta metetdaksü.

Shah-i NDA teloktep nung madenba regional party tem nungi lenirtem den senden ka amen. Iba sülen NDA mesüra opposition INDIA teloktep n a p r o n g l a n u n g m a d e n b a p a r t y t e m n u n g i l e n i r t e m d e n - a s e n d e n k a m e n a b i l l a n a a t e m a j i j e m b i o g o .

Parliament nung item bill agizükra tang Lok Sabha nung menden 543 aliba nungi menden 816 akümtsü aser iba nungjagi tetsürtem atema menden 273

Küm 50 dak tali sülen tang mezüng Lok Sabha nung menden talila aika bendenloksü. Ibaji ajanga Rajya Sabha aser legislative councils bo mekongshitsü.

Bill ka delimitation indang asütsü aser ka temzüng yanglushitsü atema asütsü. Bill

### Bihar CM Nitish Kumar-i April 10 nü MP tenangzüka agütsü

**New Delhi, April 02 (Agencies):** Bihar Chief Minister Nitish Kumar-i April 10 nü Rajya Sabha MP tenangzüka agütsü, ta osang ka ajanga metetdaksü. Kumar April 8 mesüra April 9 nü Delhi-i oa Rajya Sabha nung züngsem akümtsü atema maparen kar inyaksü aser April 10 nü MP tenangzüka agütsü.

security agütsütsü, ta metetdaksüogo. Bihar Special Security Act, 2000 kübok pa MP akümyonga pa nem maneni security agütsütsü atema telemetba agia Director General of Police aser Special dang pa nem security tajungtiba agüjang, ta tuyuogo.

Pa Bihar yimtiba, Patna-i meyipa aruba sülen April 13 nungi tenzüka anogo ishika tsüingda pai Chief Minister menden toktsütsü.

March 16 nü Nitish Kumar Rajya Sabha nung züngsem shima liasü, iba sülen March 30 nü pai Bihar Legislative Council nungi anenogo.

Bihar Home Department-i, Nitish Kumar-i Chief Minister menden nungi anenyonga pa nem maneni 'Z Plus' category

Road nung government bungalow ka reprangdangogo. Pa CM menden nungi anenba sülen iba kidangji alitsüa akok.



April 02, 2026 nü Kolkata nung Union Home Minister Amit Shah-i BJP candidates- Swapan Dasgupta aser Shatorupa na atema nüboyimja road show nung shilem agiba noksa nung angur.

**BOARD OF PRACTICAL TRAINING (EASTERN REGION)**  
under Ministry of Education,  
Department of Higher Education, Government of India  
BLOCK-EA, SECTOR-I, SALT LAKE OPPOSITE LABONY ESTATE, KOLKATA- 700064

**OSD MENDEN ATEMA ONLINE INTERVIEW (THIRD PARTY PAY ROLL)**

Outsourced (Third Party Pay Roll) basis nung Officer on Special Duty (OSD) post atema online interview nung adentsü asoshi tejangrar candidates jaoker.

|  |  |
|--|--|
| <b>A. Minimum Eligibility Criteria</b> | i) Graduate, ii) Minimum 2 years experience in any industry/establishment, iii) Possessing good communication skill in English, Hindi and any regional language of northeastern states |
| <b>B. Emolument</b>                    | Rs. 35,000/- P.M. (Consolidated)   |
| <b>C. Tentative No. of Post</b>        | 02   |
| <b>D. Date of Interview</b>            | 23rd & 24th April, 2026  |
| <b>E. Initial place of posting</b>     | Tripura or any other northeastern states   |

Candidate temi pei meyong resumes ji email id [recruitmentboptosd@gmail.com](mailto:recruitmentboptosd@gmail.com) nung April 15, 2026 anogo tashi nung mesüra iba anogo matongdang yoktsüla. Online interview nung adentsü atema link ji candidate tem den parnok meyong email id ajanga lemsateptsü. Osang tejangra metettsü aser mapang shia metepelatsü atema candidate temi office indang website [www.bopter.gov.in](http://www.bopter.gov.in) nung reprangtsü akok.

-Sd/-  
Director

**Government of India  
Ministry of Chemicals & Fertilizers  
Department of Chemicals and Petrochemicals**  
\*\*\*

Department of Chemicals & Petrochemicals-i Joint Industrial Adviser, Level-12 post ka atema tejangrar candidates dang application meshir, pay matrix ji (Rs.78,800-2,09,200) asütsü, composite method (short-term contract densema iba denji promotion).

Advertisement tejangraji website [www.chemicals.gov.in/recruitments](http://www.chemicals.gov.in/recruitments) nung agüja lir. Tejangrar candidate temi application ji prescribed format nung tim lenmang ajanga Employment News nung iba advertisement adokba sülen nungi tenzüka anogo 30 tsüingda agüja aliba iba address nung agütsütsüla :

Deputy Secretary (Admin),  
Department of Chemicals & Petrochemicals  
Room No. 231-A, Shastri Bhawan,  
Dr. Rajendra Prasad Road, New Delhi-110001

CBC 02101/11/0001/2627

**NATIONAL COUNCIL OF EDUCATIONAL RESEARCH AND TRAINING (NCERT), NEW DELHI**

**Admission to Various Teacher Education Programmes of Regional Institutes of Education**

**Advt. No: 542** **Dated: 27.03.2026**

The National Council of Educational Research and Training (NCERT), New Delhi is an autonomous organization set up in 1961 by the Government of India, Ministry of Education to assist and advise the Central and State Governments on policies and programmes for qualitative improvement in school education and teacher education. The nine constituent units of NCERT located in different parts of the country, include: (i) RIE, Ajmer, (ii) RIE, Bhopal, (iii) RIE, Bhubaneswar, (iv) RIE, Mysuru, (v) NERIE, Shillong, (vi) RIE, Nellore, (vii) NIE, New Delhi, (viii) CIET, New Delhi and (ix) PSSCIVE, Bhopal.

Applications are invited on-line from the eligible candidates for admission into various Teacher Education Programmes, viz., (i) Integrated M.Sc.Ed. (6 Year), (ii) B.Ed. (2 Year), (iii) Integrated B.Ed.-M.Ed. (3 Year), (iv) M.A. (Education Technology) (2 Year) (v) M.Ed. (2-Year) run under Regional Institutes of Education. The online application form link for Common Entrance Examination (CEE) - 2026 will be available shortly in the website <https://cee.ncert.gov.in/>. The important dates will also be notified in the same website in due course of time.

|   |                             |
|---|-----------------------------|
| <b>Date of Common Entrance Examination (CEE)-2026</b> | <b>28-06-2026* (Sunday)</b> |
|---|-----------------------------|

\*Subject to change by notification in CEE Portal.

Candidates interested are advised to be in touch with the Institute's website and leading newspapers for further updates.

**Principal  
RIE, Bhubaneswar**



## TIR YIMYIM YIMOBILEM (EDITORIAL)

DIMAPUR

ROGONÜ

RONGCHII 03, 2026

### Tai maketsangi tai ajak aben

**A**lima meimchir ajaki tai mena, anungji temenen nung samatsüba liasü saka Tsüngrem anema tai menartem ajak kümzüksü asoshi tai kenyongi maketsang Yisu Khristai pei taküm tenla agütsü. Tanü alima nung "Good Friday" amongba otsüji ibaji lir. Iba tenlaji mamai bilemtettsü asoshi asenoki iba anogo ya sarasadema amonger. 2 Korint 5:21 nung yamai shia lir, "... asenokji Tsüngremer temeshiba kümdaktsütsü asoshi kenyongi tai maketsangji asenok asoshi Pai temenen kümdaktsü." Tai aketerem kümzüksü asoshi tai marketer kati tenla agütsübaji tesüngmangtsüka lir. Atangji, nisungtem taküm alangzüksü asoshi Yihuda nunger sobaliba nung dang masü saka asenok sobaliba nunga shiruru taküm tenla agütsüba otsü asenoki meteta lir. Ajisüaka, tai aketba nisungtem kümzüksü asoshi tai maketba nisung kati peisasa mulungtetter taküm tenla agütsüba otsübo Yisu Khristai asenok menen nungi kümzüksü asoshi Pai pa taküm tenla agütsüba ya dang asütsü. Tanübo iba tenla jagi asenok temenen tesama tia nungi kümzüka lir. Iba temeim aser tekümtet asoshi asenok kanga pelar. Iba taochi jagi asenok tangbo Tsüngrem chirtem kümogo. Ajisüaka, Yisu Khristai asenok nem Tsüngremer temeshiba taküm tasen kümdaktsütsü asoshi peisasa pei mang nung zübo ketdaktsüba aser kangki nung angenloka reshikangshidaktsüba tenlaji asenoki mangatetter. Asenok temenen nung tesamar aliba nungi kümzüksü asoshi Yisu Khrista kangki nung asü, anungji asenok tang tashi temenen nung lira Pa kangki nung asüba tenlaji amajok asütsü. Yisu Khrista nisung kümer alimai alua pei taküm tenla agütsütsüsa akümbaji Isaia ainkerisaia 64:6-7 nung yamai shia angur, " onok ajak memerükba nisung ama kümogo, aser onok temeshiba ajak süjen temenen ama lir, onok süngo tu ama azülar aser onok tai agi mopong ama onok bener aor..... aser onok temenen tashi nem bendanga agütsü." Atangji, nisungi Tsüngrem temeshiba atongtsüji kanga tasak, ajisüaka Yisu Khrista ajanga anguba Tsüngrem taochi agi asenok temeshi kümdaktsüba osangji kanga tajung aser kanga jenjang tulu lir. Isaia tapu 53:5 nung ashir, " saka asenok ozüng raksaba asoshi pa dak zübo aket, asen tai menaba atema pa temang mendaktsü aser tesünep asoshi pa dak temerenshi atong aser pa dak azükba agi asenok anepa lir. Asenok ajak san ama lenmang aia ao aser asenok nisung shia pei lenmangi meyip, aser asen tai menaba ajak Kibubai pa dak benloktsüogo." Asenok asoshi Osang tajungji ibaji lir saka temulung ashitsüka, Tsüngrem chir ka nisung kümer alimai alua nisungtem nem reshikangshidakja kangki nung angenlokbaaji atamata tenla masü. 1 Yohan 1:7 nung ashir, " Tsüngrem chir Yisu zü agi asenok temenen ajak nungi merükdaktsür." Temenen ajak ta asüba nungji temenen tulu tila kecha mali mesüra tamalen menaba aser tang menaba ta kecha mali, ajakji ajak. Aji oda, kasa Lai tapu nungji ashir, " asenoki asen temenen nangzükra, asenok dang temenentem adoktsü aser memeshiba ajak nungi asenok merükdaktsütsü, Pa temulung lemtetba aser Ochi lir. Anungji, asenoki temenen mebenshi ta shira, asenoki pa tiyazü kümtsür aser Pa oji asen dak mali." Aji oda, asenoki temenen menaba ajanga dang Yisu Khrista kangki nung angenlok. Iba tenla aser taochiji asenoki mezüngmeshi masütsüla. Yisubo kangki nung timtema angenlok saka asenoki asenok temenen menangzükteba ajanga asenok mekümtettra, asenok asoshi Yisu Khrista timtembaji amajok asütsü. Aji oda, 1 Yohan tapu nung asenoki temenen mebenshi ta shira, asenoki tiyazü jembir ta ashiba nungji taochi tuluka keta lir. Iba taochiji asenoki Yisu Khristaji asen menen asoshi asü ta amangba ajanga agizükteba. Tsüngremi asenok nem pa ama temeshi alitsü agütsüba taochiji zübazübaa mebilemli aser asenok dang asen menen adokba temeim aser taochiji mezüngmeshi mesüli. Asenok dang tai adoktsü aser temeshiba kümdaktsütsü asoshi Tsüngrem chir agi Tsüngrem chir memesük nisungtem nem reshikangshia tepsetdaktsüogo. Iba tenlaji langa asen taküm Tsüngrem temeshiba nung teti alitsü merangdi.

## OLEMSABANG

### Yisu kangki nung angenlokba

L. Kika Pongener

**Yisu anema taitüba kuli :**

- (1) Pai ozü kin mashileni anir.
- (2) Pa sasa pa Yihuda nunger chuba ta ashir.
- (3) Kaisar nem alimelen magütsütsü songdemer.

Yihuda nunger yimsu lennir Farise, Saduki, tezülurtemi; sensaker, tilar, dak parnok ajangzüksü asoshi ambangyim aser tashiyim inyakba Yisu-i aitsüba agi; par kin mashileni anir ta Pa aitsü. Kenu Yisu-i nisung merijang pongu shi anogo-2 aser amtsük-5 agi chiyungdaktsü. Iba anogo nung-to, parnok kari pa chuba kümdaktsüdi ta aliba Yisu-i meteta; pa tenemleni jena oadok (Yohan-6:15). Farise-temi Kaisar nem alimelen agütsütsü asü magütsütsü (?) ta asüngdang... Yisu-i Kaisar meyong Kaisar nem agüjang; Tsüngrem meyong Tsüngrem nem agüjang ta ashi. (Mathi-22:21). Ti yazü kuli agi pa aitsü.

**Pilate chuba tsüngdang Yisu obendangba :**

Pilate chubai Yisu dang asüngdang...Na Yihuda nunger chubaji asü ? Yisu-i langzü....Nai yamaji ashir. Ano Pilate-i asüngdang... Parnoki na anema kuli kwika agütsür aji nai mangashir no ? Saka Yisu-i o kata melangzü. Pilate-i Yisu kümzüksü asoshi tanga kuli kar bushi...Pai Yisu-ji tashi agi zükdaktsüra; Yihuda nunger temulung achitsü aser chioktsü ta bilem. Yongji, Pilate-i Yisu Rom sepoy nem tarepba lisu agi zükdaktsü... Saka ibajagia kecha masü. Yihuda nunger yimsu agi kümtettsü benjong nung tasütsüsa temerenshi ngur alir (Criminal) nisung ka chioker. Anungji Baraba tasütsüsa temerenshi ngur alisang chioktsü asü (?) Yisu chioktsü ta asüngdang (?) Saka Yihuda nungeri Baraba chiokang aser Yisu kangki nung angenlokang ta ayimden. Anungji Pilate-i Yisu tasütsüsa tai kecha monguka; Yihuda nunger peladaktsütsü; Yisu kangki nung sudaktsütsü obendang agütsü. Pilate-i Kaisar aser Yihuda nunger tsübu nung Yisu kangki nung sudaktsütsü obendang agütsü.

**Yisu reshikangshiba aser tepsetba :**

Otsü zülur-i ashiba agi... Yisu nem apodaktsüba Kangki-ji sung (Undressed rough wood) agi yangluba; aser iba kangki taretji Kgs 136 shi liasü. Pa dak angenba kojai-ji inch tenet (7"inch) liasü. Pa dak arepba lisu nungji San tepo (Teeth) techira inch 1"-2" mesenloker azük. Kodang iba tepo jagi zükdir tertet tonga ayir aser shi tetsüji atsüteter atoker ta ashir. Anungji iba tangoba aser ashiba (Pain)-ji tebang agi ashitsü mali timtem tulu liasü. Ano pa kolak nung semoktsüba ai (Torn) korangji ai inch 1"-2" agi mesentepa yangluba korang semoktsü aser ajok agi tashi agi tepshiba agi tekolak nungi azü yima kanga kangshi. Aser amjang tepiyong tzü-a mejemdaktsü, chiyungtsü kecha mechidaktsü züka merenshi. Aser kalvary lenmang piyong kangki taret-ji apur jajadaktsü. Aser tanüp ya 9:00 baji shi nung Golgota tenem nung Yisu kangki nung angenloka sudaktsü.

Yamaji Pai aibelenba-yong masü...Saka asen temenen-yong asen kümtetdakba Yisu Khristai pa temang rangben aser pa azü kangkidong nung tenla agütsü. Ibajagi asenok nem teti taküm senmang tekümtet renemtsüogo.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Holy Sepulchre Tenla kidang Easter tekülem agitsü melaogo



Jerusalem nung Holy Sepulchre Tenla ki shibanger liaka Ethiopia tsür Khristan kati kikümbang anasa nokdaker sarasademba noksa nung angur. Iba noksa ya March 4, 2026 nü tangokba noksa lir.

**April 02, 2026:** Latin Patriarchate of Jerusalem-i sangdong ka ajanga, Israel keddangsertemi Holy Sepulchre Tenla kidang temeshi hopta aser Easter amongtsü atema temelaba agütsüogo, ta metetdaksü.

Tang Iran den rara aliba ajanga Israel keddangsertemi Palm Sunday anogomong nungbo Holy Sepulchre Tenla kidang tekülem nokdanga liasü.

Latin Patriarchate-i, "Akhidang nungi Holy Sepulchre nung Easter monga aruba sobaliba wazüka iba Tenla kidang tekülem sentong agitsü atema Arogo nung lenirtem nem temelaba agütsüogo," ta metetdaksü.

"Tang rara aliba ajanga lokti madenshitsu tenokdangba benoka lir, anungji Arogotemi tekülem sentong agibaji alima tesem ajak den lemsatepa live broadcast dang asütsü," ta kasa sangdong ajanga metetdaksü.

Taoba Amongnü Palm Sunday anogo nung Israel police-i Latin Patriarch of Jerusalem Cardinal Pierbattista Pizzaballa aser Holy Land Custos, Francesco Ielpo na Holy Sepulchre Tenla kidangi aitsü memelaba sülen aikati ibaji aija liasü.

Palm Sunday anogo nung Arogo nung tongti lenirtem Holy Sepulchre Tenla kidangi meidaksüba sülen Latin Patriarchate of Jerusalem-i,

"Temeshi hopta tetenzük anogo nung Arogo nung lenirtem nokdangba ajanga tatishitsu tamajung ka sayuogo aser iba hopta nung alima tesem balala nung tamanger billion aikati Jerusalem dak ranglokba mapang ka nung tamangertem aika jashidaksüogo," ta metetdaksü liasü.

Alima tesem balala nungi lenirtemi Israel keddangsertem aitsüba sülen Israel Tir, Isaac Herzog-i, "Ni phone ajanga Pizzaballa den jembidang Jerusalem yimti tejenba nung tanep tatalokba atema tejashi lemsatepogo," ta metetdaksü liasü.

Paisa, "Iba ya security dak sendakba tebilemtsü aliba ajanga liasü, kechiyong Iran keddangsertemi missiles amshia Israel nung aliba nüburtam amaker. Tesüiba mapangtem nunga Iran nung missiles aika Yirusalem yimti tejenba nung tsüka liasü," ta metetdaksü.

Israel Tir, Herzog-isa, "Israel-i yimsü balala ajak temeden wazüka ayur aser Jerusalem nung temeshi tesemtem wazüka ayur," ta metetdaksü.

Israel police-i Arogo nung lenirtem iba Tenla kidangi meidaksüba sülen Palestine sorkaria, Arogo nung lenirtem Tenla kidang külemküjatsü atema temelaba magütsüba ya ozüng alema aser Palestine nung temeden anema lir; talisa iba ya külemtsü temeden

anema lir," ta metetdaksü liasü. Italy foreign minister, Antonio Tajani-ia, iba tatalokba ya agizüktetsü makok, ta shia tasüngdangba akatsü atema Israel's ambassador to Italy jaoka liasü.

US ambassador to Israel, Mike Huckabee-ia, security dak sendakba nung Jerusalem yimti tejenbai aoba nokdangbaji tim dang, ajisüaka Arogo nung lenirtem Tenla kidangi meidaksüba jibo tesasatsüka lir, ta metetdaksü liasü.

Paisa, "Home Front Command Guidelines kübok nisung 50 mesüra iba dang nungjagi tajemba adenshitsu memelar. Arogo nung tongti lenir pezüjibo iba tenokdangba kübok maiter. Palm Sunday nü iba Tenla kidangi Patriarch meidaksüba jibo ni mangateter mesüra metentsütsü makok," ta metetdaksü liasü.

France Tir, Emmanuel Macron-ia Pizzaballa aser Jerusalem nung Khristantem pusema "Jerusalem nung tekülem agitsü temedenji yimsü balala amanger ajak nem agütsütsüla. Israel police telemtetbaji ni aitsür," ta metetdaksü liasü.

Spain Ato kilonser Pedro Sñchez, European Union foreign policy tongti Kaja Kallas aser Poland Tir Karol Nawrocki nung densema lenirtem aikati iba tatalokba atema Israel aija liasü.

## France nung Holy Saturday anogomong nung nisung aika baptitsü

**April 02, 2026:** Temeshi hopta tatemanglen Holy Saturday nü France nung nisung aikati Yisu Khrista nem taküm bendanga agüja baptitsü.

France nung taküm nisung 21,000 baptitsü aser iba ya 2025 küm den medemdangra shilem 20 agi teimba asütsü, kechiyong yaküm nisung 17,000 baptia liasü.

Taküm baptitsüpurtem rongnung parnok 8,000 bo lanurtem lir. Küm ter tejaklen temeshi hopta nung France nung

nisung 4,000 dang baptia liasü. French Bishops' Conference-i ashiba agi, baptitsü telemtetba agir shilem 40 bo shirangba, kinünger süadokba mesüra taküm nung timtem tulu ajangshiba ajanga lir, ta metetdaksü.

Shilem 32 bo tanela asentenshi sentongtem nung adenba sülen baptitsü telemtetba agirtem lir aser Khristan yimsü indang junga angatetba sülen baptitsüpurtemji shilem 34 lir.

Archbishop of Lyon, Olivier de Germay-i, "Tanübo ajungbena Tsüngrem atema tzüraba kanga bulua akümba ajanga ni süngmanger," ta metetdaksü.

Paisa, tang baptitsüpurtem maneni anepalutsüji kanga tongtibang, ta metetdaksü.

Holy Saturday nü baptitsüpurtemji shilem 82 bo arrshi küm 40 tekübokpurtem lir aser iba nungjagi shilem 42 bo arrshi küm 18 nungi 25 tsüngdapurtem lir.

## ANOGO ABEN TSÜNGREM DEN

### Tatembang ajanga temelenshi

"Shibai nenok aja Pa temulung lemtettsüsa lir, aser Pai aji inyaksü." I Tesa. 5:24.

Tetendangba makai ajungbaji kechi temulung lemtettsü ali? Tamang katetba tetendangbaji shitakba nung, ni kechi nangzük aji inyakba. Peteri Yisu kodanga metoktsütsü ta asüküma ashi. Yisui pa asemben tendang. Peteri tamakok angu. Kanga kua ajep. Tekong 23 nung, Pauli Khrista maru tashi Tsüngrem tesünepi parnok meshiteta yujang ta mepishi. Pauli aji Tsüngremi inyakdaksünü; aser asenoki bilemer; saka shitakba nung aji ataloktsü asü masü? Tanela Temeshi-i sayua Pauli "Pa temulung lemtettsüsa lir, pai aji inyaksü" ta inoktsü.

Pai inyaksü ta aseni bilembe ama pai meinyakra pa mulung lemtetba nung atidakba agi asenok tendangtsü. Saka Tsüngrem mulung lemtet memelenshir, iba indang asen tangatetba dang melenshir. Laishiba nung Tsüngrem den jajar anogo shia tendangba sayur. Tsüngrem nükjidongji parnok tabensa küma indaktsütsüba. Parnok dang masüngdangi Pai parnok taküm yanglushitsu, aser kasaji Pai asen taküm nunga inyaker. Tsüngrem Pa nükjidong, Pa inyakyim, aser Pa temoatsütem, aser item ajak Pa dang masüngdangi marur ta asen dang bilemtetdaksüba nung temulung lemteta lir. Kenü kodang asenoki Pa tejak ngudir, asenok Pa mesüka alitsü. Pai aji inyaksü. Pa temulung lemteta lir. Asenoki aji tatem anogo nung inyaksü melatsü akok, mesüra anogo shia tetendangbaji agizüka, Pa mesüka tali akümtsü akok.

Oba, Ne mulung lemtet onoki angazüktsü asoshi zülua yutsüba atema Ne tenüng asanger ta asenoki shidi aser ashiba amaji shidak alitsüla.

## Syria nung rara ajanga takümbo Easter sentongtem thinener

**April 02, 2026:** Tang Syria Orthodox aser Syriac Orthodox nung telok balala tsüngda rara Arogotemi takümbo tensa adoka aliba agi takümbo majungba nung ajemdaker Khristantemi Easter Easter sentongtem magitsü sentongtem thinenogo. telemtetba agi.

Talisa Suqaylabiyah jila nung Syrian Christians for Peace-anasa aliba jila ka nungi Muslim i sangdong ka ajanga, "Onoki nung tebur anati Khristan Syria nung ajak dang tetsür kar amokmerenba nungi longjema alitsü aser telok balala mangatetep adoka liasü. tsüngda raraba anentsü ayongzükter," ta metetdaksü.

Iba sülen Khristan teburtem Muslim nung anaji meindok, ajisüaka tenati nisung aika anir prangpong bener arua timtem agütsü. Muslim nung lokti jagi Tenla ki ka raksatsüba den külemi dokan, ki aser gari kar raksatsü.

Tang Syria nung al-Qaeda teloki timtem kanga agütsür, ajisüaka sorkari linük nung yimsü ajak temeden akhümtsübuttsü ta nangzüka lir. Ajisüaka iba linük nung ozüng alema inyaker telok aika aliba den civil war ajanga sorkari nangzükba amaji meinyakteter.

Suqaylabiyah jila nung Muslim nungeri timtem agütsüba mapang sepaitemi tiyongtsüi ia inyakba ajanga tensa azüoktetogo.

Ajisüaka Catholic, Greek

Syrian Christians for Peace-anasa aliba jila ka nungi Muslim i sangdong ka ajanga, "Onoki nung tebur anati Khristan Syria nung ajak dang tetsür kar amokmerenba nungi longjema alitsü aser telok balala tsüngda raraba anentsü ayongzükter," ta metetdaksü.

"Onoki Syria keddangsertem danga telok balala anema raraba aser tesempa o jembiba nokdangtsü atema ozüng yanglua benoktsü akhanger," ta parnokisa metetdaksü.

Christian Solidarity Worldwide Tir, Mervyn Thomas-i, "Onoki Syria nung keddangertem dang ozüng alema inyaker aser tesempa o jembirtem nokdangtsü aser Suqaylabiyah nung timtem agütsürtem ajak pua temerenshi agütsütsü akhanger," ta metetdaksü.

Paisa, "Onoki alima linüktem danga Syria nung senso ajak kümsüka ayutsü aser meimchir temeden wazüka ayutsü atema Syria sorkar rongshitsu ayongzükter," ta metetdaksü.

**AO OSHI ANGAZÜKDAK:  
TANÜ ANGAZÜKTSÜBA OJANG**



Tir Yimyim

**Wapak**

- (v) telong ngua rangpokba (cut to open)
- \* Awazüri ak tepok wapok aser tar tepin agiteta yutsü.

**Wara**

- (n) shirangtsüsa tashidak balala adokba (epidemic)
- \* Covid wara agi nisung aika süogo.

**OLONG PAITEP # 7463**

|    |  |    |  |    |    |    |   |   |    |
|----|--|----|--|----|----|----|---|---|----|
| 1  |  | 2  |  | 3  |    |    |   | 4 |    |
|    |  |    |  | 5  |    |    |   |   |    |
| 6  |  |    |  |    |    |    |   |   |    |
|    |  |    |  | 7  | 8  |    | 9 |   | 10 |
|    |  |    |  | 11 |    |    |   |   |    |
| 12 |  |    |  |    | 13 |    |   |   |    |
|    |  |    |  |    |    |    |   |   |    |
|    |  | 14 |  | 15 |    |    |   |   |    |
|    |  | 16 |  |    |    | 17 |   |   |    |
| 18 |  |    |  |    |    |    |   |   |    |
|    |  |    |  | 19 |    |    |   |   |    |

| TIPLÉN                             | LANGTSÜNGLEN              |
|------------------------------------|---------------------------|
| 1. Chi kenshiba - (6)              | 2. Yangertet - (8)        |
| 5. Kilem nung atongba merang - (6) | 3. Kisüng - (4)           |
| 6. Arem shiruru tesashi ka - (4)   | 4. Maneni - (3)           |
| 7. Nüktzü alu - (4)                | 6. Tekolak sobutsü - (6)  |
| 12. Aibelenba atema o ashi - (5)   | 8. Ya sürbo - (4)         |
| 13. Kibong yongsük - (5)           | 9. Yimdangi aru - (8)     |
| 14. Asalentong - (4)               | 10. Adenshi - (6)         |
| 17. Mimongzüng - (4)               | 11. T _ _ _ _ ü - (4)     |
| 18. Külen masü - (6)               | 15. Khu abenba lisü - (4) |
| 19. Aor benjung ka - (6)           | 16. T _ _ _ ng - (3)      |

**OLONG PAITEP # 7462 TELANGZÜBA**

| TIPLÉN :                          | LANGTSÜNGLEN :                    |
|-----------------------------------|-----------------------------------|
| 2. Pongsen, 5. Lepko, 7. Omen,    | 1. Alimang, 2. Pongen, 3. Samaru, |
| 8. Maongka, 10. Yangkhu,          | 4. Nün, 6. Pio, 9. Nüngdak,       |
| 12. Senpong, 14. Angu, 15. Raksa, | 10. Yongya, 11. Kongro, 13. Ora,  |
| 16. Arameso,                      | 14. Ata.                          |

**NAI-A YA METETTER MA**



Arunachal tsür Rupa Bayor ya India nunger Taekwondo asayartem rongnung World No. 6 aser Asia nung No.1 jenjang ajangzüktetba mezüngbuba asayar kümogo.

**Rahul-i Karbi Anglong nung Article 244(A) benoktsü nangzük**

**Guwahati, Rongchii/April 2 (Agencies):** Assam nung April 9 nü Assembly elections agitsü lia Brehostibarnü Lok Sabha nung Opposition lenir Rahul Gandhi-i, Assam nung lisopurtem nem nem temeden tali agütsütsü aser Congress nem sorkar kümteetsü atema maongka agütsüra Article 244(A) benoktsü nangzüka liasü.



Bokajan constituency nungi Congress candidate Raton Engti atema Karbi Anglong nung nüboyimtsüba mapang Gandhi-i, temzüng ozüng kübok iba provision ajanga local tem nem governance taliba aziüoktsü asoshi teyari agütsütsü, ta ashi.

"Article 244(A) benokba sülen Guwahati nungi shingai Karbi Anglong nung aliba nüburtem yimsü mesütettsü. Telemtetba agitsü asoshi tashi nenok ket nung alitsü," ta pai ashi.

Paisa, local nüburtem dak sendaka aliba telemtetbatem grassroot jenjang nung agitsü atema Congress-i Article 244(A) ya benoka liasü, ta ashi. "Nenok lenirtemi nenok yimsü asütsü aser nenok temeden kümzüka ayutsü," ta pai shisem.

BJP-i aniba sorkar indang jembiba mapang Gandhi-i, ochi mashi inyakyim balala atema

Chief Minister Himanta Biswa Sarma aitsü aser ashiba agi, state ya Centre-i aziüoker.

Paisa, Assam nung ali ya local ket nungi rakzüker corporate telok tulutem nem agütsür, ta ashi. Gautam Adani, Mukesh Ambani, aser Baba Ramdev amala tongtibang shishilembartem tetshia pai ashiba agi, item nisungtem nem mapa balala asoshi ali aika agütsüogo.

"Assam nung corporate house tulu asem nem ali bigha 98,400 shi agütsüogo. Item ali ya nüburtem ket nungi agiba lir. Assam ya ali ATM ka kümduksüogo," ta pai ashi.

Gandhi-isa, Congress sorkaribo ochimashi inyakyim anema jenjang agitsü, ta ashi. "Tang ola tulu adoka jembirtem

ajema ajema akümtsü. Jenjang tapet agitsü," ta pai ashi.

Party sentongtem indang jembiba mapang pai, tetsürtem aser tientet rogotem nem senotsü teyari ita shia sen 1,250 agütsütsü aser tang benoka aliba inyakyim melena lisopur lakh 10 nem teti atema ali patta agütsütsü nangzük. Iba den bendenloksema Congress-i kibong shia sen lakh 25 cashless health insurance cover ka benoka liasü.

Taoba küm Assam nunger kentener Zubeen Garg Singapore nung asüba indang jembiba mapang Gandhi-i, par party-i sorkar kümtetra parnoki anogo 100 tsüngda ochi obendang agütsütsü ta ashiba den kentener ya Assam maitsü lir, ta shisem.

**Ruksin nungertemi Niglok silicon factory anema tashishiba benok**

**Dhemaji, Rongchii/April 2 (Agencies):** Arunachal Pradesh, East Siang district kübok Dhemaji den arrtsü nung Ruksin circle nung aliba yimtsüng ti-i Niglok kübok Industrial Growth Centre (IGC) nung amenoka aliba ferro-silicon factory anema tashishiba agütsüogo.

Yimdaklirtemi iba factory amenokba anema mapang talangka ashishia arudar, parnoki Brehostibarnü Ruksin ADC nem tashishiba tasen ka agütsüogo, aser ashiba agi, M/s Aether Alloys LLP-i achaayangba silicon factory yagi ozüng alema No-Objection Certificate (NOC) agizük aser nüburtem den mashshitepi factory amenoka liasü.

Longkak aita aliba yimdaklirtemi ashiba agi, silicon industry yagi iba tesem nung

aliba tzü-mopung aser nüburtem health dak kongshir, anungji iba factory ya tarutsü putu atema amokmeren ka lir.

Ruksin temeket nung aliba yimtsüng balala nungi gaon burah temi ADC nem ibala mesükba tashishiba ka agütsüogo. Parnoki ashiba agi, NOC agizüksü atema silicon company tenüng nung inyakertemi parnok nem ferro-silicon factory indang osang tai agüja liasü.

GB temisa, nüburtem mit adokba khuret parnoki bena arudar, kechiyong iba ajanga kongshir alirtemi factory amenoktsü atema temelaba agütsüba asoshi parnok dang ken o ashishir, ta ashi.

Longkak aitertemi ketdangsurtem dang factory inyaksangshi anendaktsütsü aser tashishibatem

bushisüngdangtsü atema independent expert panel ka amenoktsü, aser ano nüburtem dang parnok tebilemba asüngdangtsü takhangba agütsüogo, kechiyong factory yagi tzü-mopung menentsüba ajanga local nüburtem taküm aser alirongsentem dak kongshir.

Iba factory lapokba anema temaitsü tetsür aser lanurtem aika densema yimtsüngtem nungi yimdaklir noklang aikati Brehostibarnü MMJ Road aser National Highway-515 nung longkak aitogo aser silicon factory anema yimyim balala ayima liasü.

Temetettsü kaji Niglok IGC nung amenoka aliba ferro-alloy factory ajanga tzü-mopung menentsüba indang osang angazükba sülen National Green Tribunal's (NGT) Kolkata bench-i jenjang agiogo.

**Churachandpur nung heroin soap case 439 apu**

**Imphal, Rongchii/April 2 (Agencies):** Churachandpur district kübok Ngathal ground nung March 28 nü temesepba mozü apuba sülen Manipur Police aser Narcotics Control Bureau (NCB) na longjemer temesepba mozü anema meita aoba sentong balala ayongzüka agiba mapang April 1 nü heroin soap case 232 puogo.

April 1 nü heroin soap case 232 apuba sülen tang tashi nung soap case 430 pua lir, koba seret 6.55 shi asütsü, ta

police ketdangsurtemi metetdaksü.

Taoba mapang apurtem dang ken o ashishiba dak ajemdaker meita aoba mapang item temesepba mozü ya pua liasü. Manipur Police, NCB, aser Assam Rifles nunger longjemer Ngathal ground meita aoba mapang maneni temesepba mozütem pua liasü.

Ken o dak sendakba nung Vaal Veng yimtsüng nungi Paumuanlian Tungnung (23) aser Nazareth yimtsüng nungi

Neihshial (26) na puogo. March 28 nü meita aoba mapang sepaitemi Myanmar nungi bener aruba heroin seret 3.3 soap case 207 nung bener lia apu.

Police-i ashiba agi, Narcotic Drugs and Psychotropic Substances (Amendment) Act, 2023 kübok item nisungtem aitsüogo. Temesepba mozü ya kechi nungi bener aru aser ano nisung kwi sendaka ali item ajak jangjatsü asoshi bushisüngdang maneni südar.



Packaged Foods may look Appealing, but making informed choices is essential for Good Health.

Always read the food label to understand



Ingredients and Additives

Allergens Information

FSSAI License Number

Sugar, Salt, and Fat quantities

Nutritional Information

Expiry / Best Before date

Awareness is the first step towards Healthier Eating Habits.

#HarLabelKuchKehtaHai

fssaiindia fssai fssai\_safefood fssaiindia fssai\_india

State Food Safety Authority, Department of Health and Family Welfare, Govt. of Nagaland.

MENUNGRA BILEMTETER

Tsurabur asür Alemsonglam Jamir (Chuchuyimlang)



ASO : 01.05.1925

ASÜ: 03.04.2025

Temeim Oja, Onü, Otsü! Na onok nungi pilar tanü agi küm ka junga na Onok tenük agi menguaka, nü tamang Sarasadem Onok nükla nung teti lir aser menungra-a bilemer. Nü temeim aser Sarasadem onoki kodanga mamateter.

Nü temeim chirnurtem, Semchirtem aser kinungertem.

Trump-i rara tembangtsü jembir, Iran-i Israel aser Gulf nung missiles khaloktsür

Dubai, Rongchii/April 02 (Agencies): Iran dak tetsübotsü ajunga amai samatsüogo aser rara yakta tembangtsü ta US Tir Donald Trump-i jembia Iran-i Israel aser Gulf Arab linüktem nung Brehostibarnü missiles tali khalokja Tehran dak kidanger amaktsü tashi maneni aliba sayur.

missiles arua aliba raksatsütsü inyaktar ta shia liasü. Trump o tembangba sülen Bahrain nunga sirens ola angashi, kong US Navy indang 5th Fleet lir. Lebanon south tsütsü Israel-i amakba nung nisung pezü tepset ta Health Ministry ajanga ashir, kong Iran-i yariba Hezbollah telungpuri Israel den rarar.

Iran-i Gulf linüktem den Strait of Hormuz nung amakba ajanga alima nung energy supplies nung timtem ajuruba Middle East alema oa kongshir. Iba ya Iran asoshi rara nung tajangzük tulutiba ta kuli ngutetogo. Rara tembangba sülen iba strait tanaben lapoktsü atema Britain-i linük 30 shi den jembishinü akatsü sentong lir.

Iba rara mapang Iran nung nisung 1,900 dak tema tepsetogo aser Israel nunga nisung 19 asüba osang lir. Gulf linüktem aser occupied West Bank nung nisung 20 dak tema süogo aser US service members 13 tepsetogo.

Trump-i strait ya tashiyim amshia agitettsü ta jembia arur saka yamaji inyaktü US mulung masü ta ashi. Bodhbar aonung America nüburtem den jembidang pai Hormuz ajanga abenba totzü nung metaloka aliba linüktem dang menur süaka temulung ulushia oa agitsü ajungshia liasü.

Lebanon nung nisung 1,200 dak tema tepsetogo aser million ka dak tema pei ki yutsür tesem balala nung jenshia lir. Yangji Israel nung sepai ter süogo.

US aser Israel nati February 28 nü Iran dak maka rara metenzükdang iba tzü lenmang ya rong atema lapoka liasü aser shishilempaba totzü shilem 20 iba tesem ya ajanga liasü.

Iran-i shishilempaba rong 20 shi amakba aser ano tali amaktsü amokmerenba ajanga Persian Gulf aser tziyüm sendaktepba tzi lenmang nung traffic ajunga amai anena lir.

Trump-i nüburtem den jembidang, US mitkar inyaksangshi kanga tesashi asüba yong alima nung tashi tulutiba linüktem rongnung ka ta züngshia aliba tangbo tetsübotsü maka kumogo ta ashiba Iran-i magizüker.

March 1 nungi tenzüka taoba küm kasa mapang den asadanga, iba strait nung traffic shilem 94 tajemba kumogo, ta Lloyds List Intelligence shipping data firm ajanga ashir. Rong anati fee agütsüba jangjaogo aser kar sorkar den tezüngzüktep yangluba nung ajemdaker ajanga aotsü mela ta firm ajanga ashir.

Iran mitkar indang odongtar Lt. Col. Ebrahim Zolfaghari-i Bodhbarnü ashiba agi, Tehran nok-nü, injang-bomb aser production facilities aika bendena lir. Tang tashi US-i amakba facilities ya tongtipang masü ta pai ashi.


Hormuz paidoktsü mechi Saudi Arabia-i Red Sea nung rongnendak kati totzü tali yoka arur aser Iraq-ia Syria tesem ajunga nungi Mediterranean leni totzü yok tenzüko ta Brehostibarnü ashi.

US indang nükjidong telungtiba terenem leni arur ta Trump-i mashi tsünga Dubai nung Iran-i missile khaloktsüba air defenses ajanga khazüka yoka liasü.

Brehostibarnü jembishinü akaba linük 35 nung US dak alaka G7 industrialized democracies ajunga aser United Arab Emirates aser Bahrain dena lir aser parnoki taoba ita sangdong ka nung Iran dang iba strait mokdangba anentsü takhangba agüja liasü. Britain Ato Kilonser Keir Starmer-i rong tem akhi ama tanaben senzütsü atema tapet diplomatic aser political mera agitsü atema jembitsü ta ashi. (Maneni tapak 8 nung...)

US tiri nüburtem den jembir ghonda tesadang ka majungdang Israel mitkaria

Iran army tekolakbai tanishirtem dang renemtsü tuyur



Amir Hatami

Tehran, Rongchii/April 02 (Agencies): Iran indang army tekolakba Amir Hatami-i mitkar tanishirtem dang kechi yimya nung makdir makaka kasa raratsü renema alitsü totuyuba ashir.

Hatami-i operational units tem dang tsükchir inyaksangshi kanga züngzünga aser tensa tia tamajungtiba ajurutsü ama reprangshimtsü aser tensa ajak atema renema alitsü ashi.

US Tir Donald Trump-i ano Iran anema mitkar inyaksangshi tesashiba akumtsü ama sayuba sülen iba tekumdangtsü tasen ya agütsü.

Trump-i Iran rara tatemleni arur aser hopta ishika tsünga tembangtsü ta ashiba sülen iba totuyuba ya agütsü. "Tsükchir temi ground operation tenzüksü merangra, tsükchir sepai kata takum mejenbuttsü," ta Hatami-i ashi.

State media ajanga video ka

sayuba nung Hatami ya takdang ka nung army commanders asem den ano dangar nisung ter dak tema den video call ajanga jembia liasü.

Brehostibarnü linük den jembidang, US-i taruba hopta Iran anema mitkar inyaksangshi tesashiba akumtsü sentong lir aser parnok dak kanga sashia amaktsü Washington renema lir, ta Trump-i ashi.

"Item taroktiba nükjidong tem terenemleni arur. Asenoki iba mapa renemtsü. Asenok anasai aor," ta Trump-i ashi.

"Asenoki ajak inyakogo. Par Navy tembangtsüogo. Par Air Force tembangtsüogo. Par missiles tem tagimar mesüra teraksatsümar. Anungji item inyaksangshi yagi Iran indang mitkar marakzütetetsü aser kiralongrar yariba tashi samatsür aser nuclear bomb yanglutsü tashi magütsür. Asen armed forces tem kanga alakteta lir," ta US tiri ashi.

### Khelo India Tribal Games nung Nagaland team-i medal asem angu



**Dimapur, Rongchii/April 2 (TYO):** Ibuba Khelo India Tribal Games 2026 nung Nagaland nungi Wede T Mero-i tebur 10,000 meters asemtepba nung gold medal ngua liasü. Iba asayamung ya Chhattisgarh nung asayaogo. Teburtem 10,000 meters

asemtepba nung Wede-i pa temlungtetba aser tasa tajung sayua asema state asoshi konang tetushi bener arutsüogo. Pa iba takok anguba ya pa dak sempet tajung aliba sayuba dang masü saka pai Nagaland kanga nema dangdaksüogo. Iba takok ya state ajunga nung asayartem

asoshi tajungshiba tulu lir. Kasa mapang nung Rüduolhouuo Rachel Belho-ia tetsürtem 100m asemtepba nung silver medal angu aser Tsuchoi T-i tetsür 5,000m asemtepba nung bronze medal ngua liasü. Tenapronglai temlungtetba tulu nung asaya-a takok tajung ngutetogo. Iba asayamung nung Nagaland tenüing nungi asaya 10-i Track & Field events nung shilem agi aser parnoki national jenjang nung parnok temlungtetba aser sempet tajung aliba sayuogo. Parnoki takok tajung anguba ya state asoshi kanga dang nemadangsü mapang ka aser iba ajanga nükjidong tuluba ayutsü asoshi asayartem ajungmesor.

### Süngkomen aser Mongsenbai Mkg. Inter-Ward Football Tournament final asayatsü

**Mokokchung, Rongchii/April 02 (TYO):** 7Buba Mokokchung Inter-Ward Football Tournament-2026 final Süngkomen ward aser Mongsenbai ward Imkongmeren Sports Complex Mokokchung nung April 4 nü nikonngang 1:00 ako nungi tenzüka asayatsü.

Tanü tanabuba Semi Finals Tongdentsüyong Ward aser Mongsenbai Ward tsüingda asayaba nung Mongsenbai Ward nungi Nungheter, Imnatoshi, Ashish aser Menjur par pezü-i goal kaka yokba den ano Suponglemba-i goal-2 tashi yokteta item goal-6 jagi Mongsenbai Ward-i

Tongdentsüyong Ward ayong ayonga kokteta Mongsenbai Ward Final asayatsü jenjang ajangzükteta liasü. Asüing final asaya metenzükdang sentong tatsüka agitsü renema lir aser iba sentong nung tetushi tejaoker Wb. Rongsenshilu asütsü.

### Roberto De Zerbi Tottenham head coach kümogo

**Rongchii/April 2, 2026 (Agencies):** Tottenham-i team head coach asütsü Roberto De Zerbi shimba sangdongogo. Pa den küm pongu atema tenangzüktepba yangluogo, saka parnok tang asaya aliba Premier League ya koda tembangtsü ta ajaki repranga atadar. League nung asaya tenet asayatsü ajunga lia Spurs pur relegation zone-i point ka agi dang mai lir aser parnok taruba Deobarnü Sunderland den asayatsü. "Ni iba football club nung adenba atema kanga pelar, koba alima nung club tulutiba ka aser kanga temaba jenjang nung aliba club ka lir," ta Italy nunger

coach yagi ashi. Taoba Deobarnü kidang Nottingham Forest pur makokba sülen Spurs puri interim manager, Igor Tudor mapa nungi anenja liasü. February 14 nü Thomas Frank melenba sülen Tudor lenisüba nung Tottenham puri league asaya pongu nungi point ka dang ngua liasü. March 5 nü kidang Crystal Palace pur makokba sülen Tottenham puri Tudor melentsüpur bushi tenzüka liasü. Spurs puri taoba mapanga De Zerbi shimtsü atema aiben asadangogo. Parnoki 2023 kuma pa asadang saka Ange Postecoglou shima liasü.

### STATE OSANG : Tapak 1 nungi...

#### NPP tokolakba Conrad K. Sangma-i...

"Tanü ya Nagaland nungi NPP legislator kata mangur, anungji, parnok marubaji langka kuli kar ali asü?" ta iba osangbeneri metetnua asüingdangdang, lokteper aoba sarkar nungji mapangaben timtem ajurur, saka aji politics yimya dang, saka onoki coalition partner dang angatetdaksür aser tongtibangsa onoki shinga anema meinyaker saka onok nükjidong kechi lir ibaji indang-indanga inyaksü meranger. "Hau, NPP legislator maruaka NPP tokolakba tonga aruogo, anungji, iba jagi teperi ta bilemer, aser party lungjema lir aser tongti lenirtem ajak yangi lir aser ozü party candidate-i takok

angutsü imlar", ta pai langzü. Iba constituency ya rali-walir/metapenzürtem (tourism) aser aluyimba tsütsü kanga dang ngujem tulu angur, aser yangi lanurtem sempet aketer aika lir, anungji, Longkhum nung Cherry Blossom benjong ama mesüra Longkhum indang bengana itemji tajungba renloka bener aotsü lenmang aika lir aser iba ajanga lanur mapa inyaksü maongka aser lenmangtem lapoktsü imlar, ta paisa shisem. "Naia AFSPA indang ya kechi ashir?" ta metetnua asüingdangdang, Sangma-i, Armed Forces Special Powers Act anema party-i noktaker, NPP-i AFSPA memulunger, security ayutsü atema

tanga ozüing aika lir aser iba ya agiintsüla, ta ashi. Tanü iba sentong nung Longkhum putu yimsüsür, NPP candidate I. Abenjang, Khensa nungi tebu-teti Temsu Jamir parnokia shilem agia liasü. Iba sentong nung NPP Vice President Vevoyi Wideo aser General Secretary (Political) Mmhonlumo Kikon aser ano party lenirtem aika densema liasü. NPP tokolakba Sangma-i lokti senden temer Naga nunger nüngtugu linük tenzüker Imkongmeren Ao leper semdanga pa nem aküm tetushi agitsü. Paisa Alichen-a semdanga liasü ta osang ajanga angazüker.

### Dimapur nung DC Office tasenba atema...

Sentong nung Commissioner of Nagaland, Gregory Thejawalie, IAS-i pela agizükba o jembidang iba complex tasenba ya Dimapur nung sorkar inyakyim indang 'nerve centre' ka akumtsü, ta ashi. Mezüingbo Dimapur ya Kohima district kübok subdivision ka ama treasury office building ka nungi inyaksangshia liasü, ta pai ashi. Mezüingbuba office building ya 1974 küm Nagaland CM inyaka alisang Asür Vizol-i semzüksü. Dimapur ya Nagaland nung district ti buba ama December 2, 1997 nung upgrade süa Deputy Commissioner indang office amenok, ta pai ashi. Dimapur DC office complex tasenba indang Asst. Chief Engineer (CAWD), Office of the Commissioner, Kohima, Er. Sungtiba Amer-i tongmelang agi rasaa ashi. Iba project nungya modern G+2 office complex den water

supply aser sanitation facilities, sentry aser exit gates, compound fencing, approach road, compound flooring, flag hosting stage, walking pavement with concrete pavers, canteen, barrack, aser gazebo units ana alitsü, ta pai ashi. Iba mapa ya M/s C.K Enterprise ajanga sen 14,96,68,000 agi inyaksü. Iba complex ya design aser estimate ya Chief Architect, PWD (Planning & Design) ajanga yanglu aser Assistant Chief Engineer, CWAD ya executing agency alitsü, ta pai metetdaksü. Work order mapang ya November 7, 2025 nungi ita 24 atema agütsü, ajisüaka tang aliba DC Office tejenba bensatsü ita asem nungi trok tashi agitsü aser shidakba kisüba maparen iba sülen ang tenzüktetsü, ta ashi. Anungji iba ki renemtsü mapang atsülangtsü akok, ta ashi. Iba office complex tasazük (plinth area) 29,909 square feet alitsü, ground floor nung Aadhar

Cell, ILP Cell, Post Office, ATM, Judicial Branch, Revenue Branch, DLRSO, DDMA, DHEW, Planning Department aser Meeting Hall alitsü. Mezüing floor nung Deputy Commissioner indang takdang den mini conference hall, ADC takdang, EAC takdang. General Establishment section aser Account Branch alitsü. Tanabuba floorya CAWD atema yutsütsü, kong EAC takdang talila, Conference Room, Election Branch aser NIC office den Video Conference Room alitsü. Floors ajunga nung tetsür aser tebur metzü meshiba tesem balala alitsü aser ground floor nungi lift aser ramp alitsü. Iba sentong nung CSOs tenüing nung Naga Council Dimapur tir GH Rengma-i jemi aser Dr. Tinojongshi Chang, NCS, Deputy Commissioner, Dimapur-i melepzüing o jembia liasü.

### STATE OSANG : Tapak 2 nungi...

#### Noise pollution ozüing ajang ajanga...

Kasa tetuyuba nungsa Supreme Court-i Diwali (8:00 PM nungi 10:00 PM), Gurpleb (4:00 AM nungi 5:00 AM aser 9:00 PM nungi 10:00 PM), aser küm tasen aser Khristmas (11:55 PM nungi 12:30 AM) benjung amungdang mapang tatakzük ka nung item bomb tem amshitsü temelaba agütsür aliba shisema lir. Aibeleneritem rongnung kija aser kibongtem dang senchi sen 1000 nungi 3000 tashi aser sentong balala ayonger dang senchi sen 20,000 aser banquet hall aser moapu nung sentong ayongertem dang senchi sen 20,000 nungi 1,00,000 tashi achitsü. Tetuyuba sülen aiben manidakra item kija aser lokti

tentetemi sentong ayongzüka agiba tesemtem shibangtsütsü. Anaben aibelenra senchi ya anasü agi timba aser asemben aibelenra asemsü agi timba meshitsü aser iba den hadir mesüra tesem balala amshitsü atema temelaba kodanga magütsütsü, ta tetuyuba nung shia lir. District Police aser iba tetuyuba benoka inyaksü aliba ketdangsurtem dang kanga junga meita atatsü aser tebandang kecha makai ajak kasa merenshitsü tetuyuba agütsüogo. District Administration-isa, iba tetuyuba ya tang nungi benoka inyaksü ta ashiba den ajak dang tetuyuba sülen tashi anga anidaksü mepeshia metetdaksüogo.

### BENDANGLI OSANG : Tapak 7 nungi...

#### Trump-i rara tembangtsü jembir...

Rara adoka lia linük katia tashiyim amshia iba strait lapoktsü asoshi merangtsü tejangraba aliba majiteter. France Tir Emmanuel Macron-i South Korea semdangba mapang iba tzü lenmang agitsü atema military operation ka tenzüksü tetemsü masü ta shia liasü. Ajisüaka US aser Israel nati amakba anenba sülena iba strait ajanga senzusempongba nung Iran-i tenokdangba agütsütsü akok ta tebilemstü akar. Iba rara mechi totzü aser natural gas jenjang tali akumer, stock markets anokshitsür, gasoline jenjang timba akumer aser chiyongtsü densema osettsüset aika sen timba

akumtsü jenjang nung lir. Brehostibarnü Brent crude, international standard ya ano timba kuma spot trading nung sen \$108 meshia liasü, koba February 28 nü Israel aser US nati rara tenzükdang meshiba dang nungi shilem 50 shi agi timba akumba lir. Strait of Hormuz ajangba totzü aser gas ya timba Asian linüktem dang ayoker, saka region nungi Brehostibarnü iba strait atema takhangba agütsüba nung Japan aser South Korea kisüing dena lir. Iba rara mechi jet fuel belenshiba nunga timtem agütsür, anungji alima tesem balala nung senzusemponger tem asoshi takoksa alitsü.

### BILEMDANGANG "Taochi agi na aser ni kümzük."